

आकाशवाणी

खास-खास खबरां:-

- प्रधानमंत्री नरेन्द्र मोदी होरें आखेआ ऐ जे भारत दुनिया आस्तै इक भरोसेमंद सांझेदार दे तौर पर उभरा रदा ऐ।
- प्रधानमंत्री नरेन्द्र मोदी होर अज्ज नमीं दिल्ली च “विकसित भारत रोजगार” योजना तैहत 2 ज्हार 4 सौ करेड रपे दी प्रोत्साहन राशी दी बंड करडन।
- केन्द्र नै 4 राज्यें आस्तै घट्टो-घट्ट समर्थन मूल्य पर दालां ते तिलहनें दी बड्डी पैमाने पर खरीद दी मंजूरी दिती।
- राष्ट्रपति द्रोपदी मुर्मू होर मध्य प्रदेश च आयोजित होने आहले अंतराष्ट्रीय Sickle Cell दिवस सरबन्धी कार्यक्रम च शामिल होडन।
- अमरीका नै ईरान दी बंदरगाहें ते तटीय क्षेत्रें च ज्हाजें दी आवा-जाई पर लाई गेदी समुन्द्री नाकाबंदी हटाई लैती ऐ।
- ते भारत नै कल न्यूजीलैंड च FIH महिला National Cup च पूल-ए दे मैच च उरुगे गी 3-2 कन्नै हराइयै लगातार त्री जित्त हासल कीती।

<><><><><><>

PM- Indian Community

प्रधानमंत्री नरेनेद्र मोदी होरें आखेआ ऐ जे भारत विश्व लेई इक विश्वसनीय सांझेदार दे रुप च उभरा करदा ऐ। कल रातीं पेरिस च भारतीय समुदाय गी सम्बोधित करदे होई मोदी होरें आखेआ जे इक समें हा- जिसले देशै बश्कार सरबन्ध छड़े ब्यार पर आधिर हे- पर अज्ज ब्यार दे कन्नो-कन्नी विश्वास बी उन्ना गै महत्वपूर्ण होई गेआ ऐ। प्रधानमंत्री होरें आखेआ जे सब्बै देश इक विश्वसनीय आपूर्ति शृंखाल ते इक स्थिर सांझेदारी चाहंदे न।

मोदी होरें आखेया जे देश उ'नें सब्बनें क्षेत्रें च निवेश करा रदा ऐ- जेहडे औने आहली पीढ़ियें लेई विकास- नवाचार दे अवसर प्रदान करगन। उ'नें आखेआ जे एह भारत दी यात्रा दा इक निर्णायक दौर ऐ- जित्थे आकांक्षां नमियां ऊंचाइयां छूआ करदियां न।

एहदे शा पैहले मोदी हुंदा सुआगत “बोनजोर मोदी” दे संदेश ते “भारत माता दी जय” दे नारे कन्नै कीता गेआ। फ्रांस च भारतीय समुदाय बड़ी गितरी च किट्टा होआ ते “मोदी-मोदी” ते “भारत माता की जय” दे नारे लाए।

<><><><><><>

PM- Paris Visit

प्रधानमंत्री नरेन्द्र मोदी होर फ्रांस दी सफल यात्रा दे परैन्त स्वदेश लेई खाना होई गे न। सोशल मीडिया पोस्ट च मोदी होरें आखेआ जे औने आहले समें च भारत ते फ्रांस दी मित्रता होर बी निगार होग। प्रधानमंत्री होरें आखेआ जे फ्रांस दी इस यात्रा कन्नै केई महत्वपूर्ण नतीजें हासिल होए न। इस महत्वपूर्ण यात्रा दी शुरुआत नीस च भारत इनोवेट्स कार्यक्रम कन्नै होई। एहदे मगरा प्रधानमंत्री एविया च जी-7 शिखर सम्मेलन च शामिल होए। फ्रांस दे राष्ट्रपति इमैनुएल मैक्रों होरें प्रधानमंत्री मोदी हुंदी फ्रांस यात्रा दे समापन पर हिंदी च विशेष विडियो संदेश रिकार्ड कीता।

<><><><><><>

PM- VBRY

प्रधानमंत्री नरेन्द्र मोदी होर अज्ज नमीं दिल्ली च “पी. एम विकसित भारत रोजगार” योजना दे तैहत 3 ज्हार 4 सौ करोड़ रपे दी प्रोत्साहन राशि दी बंड करडन। इस योजना कन्नै मुलख भरै च 15 लक्ख रोजगार दे मौके पैदा होए न। श्रम ते रोजगार मंत्री डाक्टर मनसुख मांडविया होरें आखेआ ऐ जे अगस्त 2025 च शुरु होई दी इस योजना दे तैहत हुनै तगर 60 लक्ख थमां मते कर्मचारियें गी औपचारिक कार्यबल च शामिल कीता गेआ ऐ- जेदे च लगभग 30 फीसद महिला न।

<><><><><><>

Shivraj MSP

राई-बाई ते करसानें दे कल्याण सरबन्धी मंत्री शिवराज सिंह चौहान होरें 4 राज्यें तमिलनाडू- गुजरात-उत्तर प्रदेश ते हरियाणा आस्तै घट्टो-घट्ट समर्थन मूल्य MSP पर दालें ते तिलहनें दी बड्डे पैमाने पर खरीद गी मंजूरी देई दिती ऐ। राई-बाई ते करसान कल्याण मंत्रालय नै दस्सेआ ऐ जे इन्हें राज्यें च एह खरीद मूल्य समर्थन योजना दे तैहत कीती जाग। इस बरे थहोई दी मंजूरी आहली खरीद तैहत उत्तर-प्रदेश गी सब्बन थमां मता लाह होआ ऐ।

राज्य आस्तै 48 ज्हार 298 मीट्रिक टन मूंगी- 97 ज्हार 970 मीट्रिक टन उड़द ते 41 ज्हार 718 मीट्रिक टन मूंगफली दी खरीद गी मंजूरी दिती गेई ऐ। इंदा कुल MSP इक ज्हार 490 करोड़ रपे थमां मता ऐ। गुजरात लेई इस बरे थहोई दी मंजूरी तैहत 18 ज्हार 250 मीट्रिक टन मूंगी दी खरीद दी मंजूरी दिती गेई। मंत्री होरें रबी रुतै 2025-26 तैहत तमिलनाडू आस्तै मूंगी दी खरीद सीमा गी 885 मीट्रिक टन थमां बदाइयै 990 मीट्रिक टन करने गी मंजूरी दिती ऐ- जेदे कन्नै बादू 105 मीट्रिक टन मूंगी दी खरीद मुम्मकन होग। कृषि मंत्री होरें हरियाणा आस्तै 2 ज्हार 115 मीट्रिक टन मूंगी दी खरीद गी मंजूरी दिती। इस खरीद दा कुल MSP 18 करोड़ रपें थमां मता होग।

<><><><><><>

Prez Sickle Cell

राष्ट्रपति द्रौपदी मुर्मू अज्ज मध्य प्रदेश दे ओंकारेश्वर च अंतराष्ट्रीय सिकल सेल ध्याड़े दे मौके पर आयोजित कार्यक्रम च हिस्सा लैगन। एहदे मगरा ओह ओडिशा दे रायरांगपुर च केई विकास परियोजनाएं दा उदघाटन करगन। इंदे च AIIMS भुवनेश्वर आसेआ आयोजित मेडिकल शिविर- खनन प्रभावित ग्राएं आस्तै विशाल एकीकृत ग्रामीण पाइपलाईन जल आपूर्ति परियोजना- ब्रह्मा- कुमारिस दा मातृशक्ति भवन ते इक विशेष सर्किट हाऊस शामिल ऐ। यात्रा दे अगले गेड़ च राष्ट्रपति मुर्मू ते प्रधानमंत्री नरेन्द्र मोदी कल ओडिशा दे मयूरगंज जिले दे पहाड़पुर गां दा दौरा करगन।

<><><><><><>

US- Naval Blockade

अमरीका नै ईरान दी बंदरगारें ते तटीय क्षेत्रें च ज्हाजें दी आवा-जाई पर लाई गेदी समुन्द्री नाकाबंदी हटाई लैती ऐ। सोशल मीडिया पोस्ट च अमरीकी केन्द्रीय कमान नै आखेआ ऐ जे राष्ट्रपति डोनाल्ड ट्रम्प हुंदे दिशा-निर्देश मुजब ईरान दे खिलाफ चलाए जा'रदे अमरीकी नौ-सैनिक अभियान गी खत्म करी दिता ऐ। हालांकि नाकाबंदी हटाए जाने दे बावजूद समझौते दे अनुपालन दी निगरानी आस्तै अमरीकी नौ-सैनिक आले-दोआले तैनात रोहडन। राष्ट्रपति ट्रम्प होरें ईरान कन्नै लगभग 4 महीने तगर चले दे संघर्ष दे बाद होए दे शांति समझौते दे इक दिन मगरा एह घोषणा कीती। एस गेंऽ कन्नै ईरान दे समुन्द्री ते ओदे आले-दोआले दे क्षेत्रें च ज्हाजें दी आवाई सौखी होने दी मेद ऐ।

<><><><><><>

Sitharaman- Meghalaya Visit

केन्द्रीय खजाना मंत्री निर्मला सीतारमण होर अज्ज मेघालय च पूर्वोत्तर दे सब्बनें थमा बड्डे जैविक मसाला प्रसंस्करण संयत्र दा उदघाटन करडन। ओह अज्जै थमां 2 दिन लेई मेघालय दे दौरे पर न। अपने दौरे दौरान ओह इस संयत्र दा उदघाटन करडन। इस संयत्र च सालाना 10 ज्हार 3 सौ 46 टन मसाले दा प्रसंस्करण होग। एदे राए खित्ते दे 5 ज्हार 5 सौ जैविक करसानें गी लाह होग।

<><><><><><>

V.P- Ladakh

उपराष्ट्रपति सी.पी. राधा कृष्णन होर अज्जै थमां त्रै-दिन लेई लद्दाख दौरे पर जा'रदे न। ओह लेह च "अंतराष्ट्रीय योग दिवस" समारोह च हिस्सा लैडन। राधाकृष्णन हुंदी केन्द्र शासित प्रदेश लद्दाख दी एह पैहली यात्रा ऐ। इस दौरान उपराष्ट्रपति कल लुकुंग ग्रां जाडन- जित्थे ओह मुकामी आप सहायता समूहें कन्नै गल्लबात करडन। ओह वाइब्रेंट विलेज कार्यक्रम तैहत बन्ने आहले इलाकें च चला रदी विकास परियोजनाएं दा निरिक्षण करडन।

मगरा ओह युद्ध स्मारक जाइयै श्रद्धांजली बी भेंट करडन। राधाकृष्णन होर 21 जून गी लेह च अंतराष्ट्रीय योग दिवस समारोह च हिस्सा लैडन। इस कार्यक्रम च युवा- सशस्त्र बले दे जोआन ते बक्ख-बक्ख संगठनें दे सदस्य योग कार्यक्रम च शामिल होडन।

<><><><><><>

Yoga Workshop

पार्लिमानी मामले सरबन्धी मंत्रालय नै अंतराष्ट्रीय "योग दिवस 2026" थमां पैहले कल नमीं दिल्ली च संसद भवन परिसर च इक योग कार्यशाला दा सरिस्ता कीता। संसदीय मामले दे मंत्रालय दे अपर सचिव डाक्टर सत्य प्रकाश होरें कार्यशाला दा उदघाटन कीता ते अंतराष्ट्रीय योग दिवस 2026 दे मौके पर सरकार आसेया आयोजित कीती जाने आहली गतिविधियें दा ब्यौरा पेश कीता। कार्यशाला दा मार्ग-दर्शन लाल बहादुर शास्त्री राष्ट्रीय संस्कृत विश्वविद्यालय दे प्रोफैसर डाक्टर रमेश कुमार होरें कीता। उनें दस्सेआ जे दफ्तर दे समें च योग दा अभ्यास करने कन्नै तना घट्ट करने ते कार्यकुशलता बढ़ाने च किया मदद थहोई सकदी ऐ।

<><><><><><>

FIH Women's Hockey

भारत नै कल न्यूजीलैंड च FIH महिला नैशनल कप च पूल –ए दे मैच च उरुग्वे गी 3-2 कन्नै हराइयै लगातार त्री जित्त दर्ज कीती ऐ। भारत दी भेठा दीपिका नै 2 गोल ते दीपिका सोरेंग नै इक गोल कीता। उरुग्वे दी चियारा ते मैनुएला विलार नै गोल कीता। भारत नै पूल-ए च शीर्ष थाहर हासिल करिए सैमीफाईनल च थाहर बनाई लैती ऐ। सैमीफाईनल च भारत दा मुकाबला चिली कन्नै होगा।

<><><><><><>

FIFA World Cup

फीफा विश्व कप च कल रातीं अमरीका दे अटलांटा स्टेडियम च ग्रुप-ए दे मैच च चेकिया ते दक्खन अफ्रीका बश्कार मुकाबला इक-इक गोल कन्नै ड्रां रेआ। एदे नतीजें च दौनों टीमें दे नाँक आउट दौर च पुजने दी मेद बनी दी ऐ। एदे थमां पैहले कल ग्रुप-ए च मैक्सिको सिटी च खेड्डे गेदे मैच च कोलंबिया नै उज्बेकिस्तान गी 3-इक कन्नै हराई दिता। ग्रुप- L च धाना नै पनामा गी इक-सिफर कन्नै हराइयै महत्वपूर्ण अंक हासिल कीता।

<><><><><><>

IMD-Weather

मौसम विभाग नै अज्ज असम- मेघालय-पश्चिम बंगाल दे तराई आहले क्षेत्र ते सिक्किम च किश थाहरें पर बड़ी मती बरखा दा अनुमान जाहिर कीता ऐ। अरुणाचल प्रदेश-बिहार- नागालैंड- मणिपुर- मिजोरम- त्रिपुरा- तमिलनाडू- पुदुचेरी ते कराईकल च बी दिनै बरखा दी संभावना ऐ। मौसम विभाग नै हिमाचल प्रदेश- जम्मू कश्मीर- लद्दाख- गिलगित- मुजफराबाद ते उत्तराखंड च अज्ज तूफान कन्नै ऐन गड़ा पौने दी शेंका जताई ऐ। दिल्ली- हरियाणा- चंडीगढ़- पंजाब ते तेलंगाना च अज्ज गरज-चमक कन्नै तेज हवा चलने दी संभावना ऐ। बिहार- रास्थान-ओडिशा- झारखंड ते मध्य प्रदेश दे किश हिस्सें च बी अज्ज इय्ये नेंई स्थिति बनी दी रौहग। महाराष्ट्र तेलंगाना त उत्तर-प्रदेश च अज्ज लू दी स्थिति बनी रौहने दी संभावना ऐ। आंध्र प्रदेश- पश्चिम बंगाल दे गांगेय क्षेत्र- कोंकण-गोवा ते ओडिशा च अज्ज गर्म ते गुम्मे आहला मौसम बने रौहने दी संभावना ऐ।

<><><><><><>